



Pranuar / Dorezuar Punijeno/Prodato Received/Delivery	26	10	0	viti god year
Organ /Njesia Organ /Jedinita Org /Unit	Nr Prot Pr. No	Shtojca Prilog Appendix	Sasia Kolicina Quantity	
BKPNESHICK	2267/2020		116	



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.251/2020

Këshilli i Pavarur Mbikëqyrës për Shërbimin Civil të Kosovës-Kolegji për shqyrtimin dhe vendosjen e ankesave në përbërje nga: Arditë Haxhnikaj-Demi-kryetare, Arben Mehmeti dhe Eshref Shabani-anëtarë dhe Zyle Millaku Gojnovci-Zyrtare e Lartë për Bashkëpunim Profesional në cilësinë e procesmbajtësit, ka shqyrtuar ankesën Nr.251/2020 të datës 28.08.2020 të parashtruar nga ankuesi [REDACTED], me adresë rruga "Bahri Fazliu", blloku C. Kati VI Nr.17 në Prishtinë, kundër Vendimit me Nr. Prot: 330/20 të datës 04.08.2020 të Komisionit për Zgjidhjen e Kontesteve dhe Ankesave të Ministrisë së Punëve të Brendshme, në çështjen juridike-administrative "kontestim konkursi", duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.2 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 26.10.2020, mori këtë:

V E N D I M

- I. **APROVOHET** ankesa me numër A.nr. 251/2020 e datës 28.08.2020 e parashtruar nga ankuesi [REDACTED].
- II. **SHFUQIZOHET** Vendimi Nr. Prot:330/20 i datës 04.08.2020 i Komisionit për Zgjidhjen e Kontesteve dhe Ankesave i Ministrisë së Punëve të Brendshme, Vendimi Nr.466 i datës 17.06.2020 i U.D Sekretares së Përgjithshme të Ministrisë së Punëve të Brendshme si dhe të gjitha njoftimet që rrjedhin nga ky vendim.
- III. **OBLIGOHET** Sekretari i Përgjithshëm i Ministrisë së Punëve të Brendshme, që të bëjë zbatimin e këtij vendimi duke bërë lëshimin e Akt Emërimit për ankuesin [REDACTED] konform dispozitave të legjislacionit për Shërbimin Civil të Republikës së Kosovës, brenda 15 ditësh nga dita e pranimit të tij.
- IV. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.
- V. Vendimi hyn në fuqi në ditën e nënshkrimit nga Kryetari i Kolegjit për Shqyrtimin dhe Vendosjen e Ankesave.

A r s y e t i m

Ministria e Punëve të Brendshme në bazë të autorizimit të datës 10.09.2019 të lëshuar nga Departamenti për Administrimin e Shërbimit Civil në kuadër të Ministrisë së Administratës Publike, me datë 14.09.2019 ka shpallur konkursin për pozitën "Zyrtar i lartë për Riintegrim" në Departamentin për Riintegrimin e Personave të Riatdhesuar në të cilin ka aplikuar edhe ankuesi Driton Krasniqi. Afati i aplikimit për këtë konkurs është vazhduar nga data 05.10.2019 deri me 11.10.2019.

Me datë 11.09.2019 ka hyrë në fuqi Ligji Nr.06/L-114 për Zyrtarët Publik. Pas hyrjes në fuqi të këtij ligji, Ministria e Administratës Publike me datë 07.10.2019 ka njoftuar të gjitha institucionet publike për hyrjen në fuqi të Ligjit për Zyrtarë Publik dhe ka udhëzuar që të gjitha procedurat e konkurseve të cilat janë shpallur sipas dispozitave të Ligjit Nr.03/L-149 për Shërbimin Civil të pezullohen përkohësisht. Bazuar në këtë njoftim, Ministria e Punëve të Brendshme me datë 08.10.2019 përmes shkresës Nr.782/19 të publikuar në webfaqe të Ministrisë ka njoftuar së është pezulluar procedura e rekrutimit për pozitën "Zyrtar i lartë për Riintegrim".

Ligji Nr.06/L-114 për Zyrtarët Publikë, me datë 25.11.2019 është pezulluar me vendimin Nr. ref.:VVMP 1525/20 për Masë të Përkohshme nga Gjykata Kushtetuese. Pas vendosjes së masës së përkohshme të Ligjit Nr.06/L-114 për Zyrtarët Publikë, Ministria e Administratës Publike me datë 10.01.2020 ka lëshuar njoftim me shkrim dhe ka udhëzuar të gjitha institucionet publike që ti aplikojnë dispozitat e Ligjit Nr.03/L-149 për Shërbimin Civil. Bazuar në këtë njoftim, Ministria e Punëve të Brendshme ka vazhduar procedurën e pezulluar për rekrutimin e pozitës "Zyrtar i lartë për Riintegrim" ku ka themeluar Komisionin Përzgjedhës, ka organizuar testin me shkrim, intervistën me gojë dhe në tërësi ka përfunduar procedurën e rekrutimit me datë 26.02.2020 përmes publikimit të njoftimit për kandidatin e suksesshëm [REDAKTUAR].

Më datë 17.06.2020 U.d. e Sekretarit të Përgjithshëm të Ministrisë së Punëve të Brendshme ka nxjerr Vendimin Nr.466 me të cilin ka anuluar konkursin e datës 14.09.2019, me arsyetimin se Ministria e Punëve të Brendshme dhe Ministria e Administratës Publike preken nga procesi i fuzionimit apo bashkimit sipas Vendimit nr. 07-v-005 të datë 03.02.2020 të Kuvendit të Republikës së Kosovës, si dhe me arsyetimin se procedura e listës së ngushte është bërë jashtë afatit prej 5 dite të përcaktuar me Rregulloren 02/2010 për Procedurat e Rekrutimit në Shërbimin Civilë.

Kandidati i përzgjedhur [REDAKTUAR], i pakënaqur më Vendimin Nr.466 të datës 17.06.2020, brenda afatit ligjor, me datë 09.07.2019 me nr. Prot.291/20 ka parashtruar ankesë në Komisionin për Zgjidhjen e Kontesteve dhe Ankesave në Ministrinë e Punëve të Brendshme, me pretendimin së konkursi është anuluar në kundërshtim me legjislacionin e aplikueshëm për Shërbimin Civil. Komisioni për Zgjidhjen e Kontesteve dhe Ankesave përmes vendimit Nr.330/20 të datës 17.06.2020, ka refuzuar ankesën e ankuesit [REDAKTUAR] dhe ka vërtetuar vendimin Nr.466 të datës 17.06.2020 të U.d. Sekretarit të Përgjithshëm të Ministrisë së Punëve të Brendshme.

Ankuesi [REDACTED] kundër Vendimit Nr. Prot:330/20 të datës 04.08.2020 të Komisionit për Zgjidhjen e Kontesteve dhe Ankesave të Ministrisë së Punëve të Brendshme, më datë 28.08.2020 ka parashtruar ankesën në Këshillin e Pavarur Mbikëqyrës për Shërbimin Civil të Kosovës, me pretendimet ankimore se ky vendim është në kundërshtim me dispozitat e Ligjit Nr.03/L-149 për Shërbimin Civil, si dhe aktet nënligjore të cilat dalin nga ky ligj.

Këshilli i Pavarur Mbikëqyrës për Shërbimin Civil të Kosovës, më datë 16.09.2020, ankesën e ankuesit e ka proceduar për përgjigje në ankesë tek Ministria e Punëve të Brendshme. Kjo e fundit më datë 29.09.2020 ka përcjell gjithë dokumentacionin lidhur me këtë lëndë.

Bazuar në nenin 17 paragrafi 2 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, Kryetari i Këshillit, me kërkesë të Kryetarit të Kolegjit, më datë 14.10.2020 ka nxjerr Vendimin VK.nr.1/2020 përmes të cilit ka vazhduar afatin e vendosjes edhe për dhjetë (10) ditë pune, lidhur me ankesën Nr.251/2020.

Kolegji për shqyrtimin dhe vendosjen e ankesave, me qëllim të vërtetimit të plotë dhe të drejtë të gjendjes faktike, për marrjen e vendimit meritore ka administruar këto prova: Ankesën me numër protokollit 1645/2020 të datës 28.08.2020 e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Vendimin me Nr. Prot:330/20 të datës 04.08.2020 të Komisionit për Zgjidhjen e Kontesteve dhe Ankesave të Ministrisë së Punëve të Brendshme; Njoftimin nr.143\20 të datës 26.02.2020 për kandidatin e suksesshëm; Njoftimin për anulim të konkursit nr.254\20 i datës 18.06.2020; Ankesën e ankueses e datës 09.07.2019 e parashtruar në Komisionin për Zgjidhjen e Kontesteve dhe Ankesave; Vendimin e datës 05.02.2020 për themelimin e Komisionit Përzgjedhës të Shërbimit Civil; Formularin e regjistrimit të aplikacioneve të pranuar; Formularin e listës së shkurtër i datës 11.02.2020; Formularin Form.MAP-SHCK-05 për përcaktimin e kritereve për përfshirjen në listën e ngushtë; Formularin Form.MAP-SHCK-07a për përcaktimin e kritereve për testim me shkrim dhe me gojë për vendin e punës për të cilin nuk kërkohet njohja e ndonjë gjuhe të huaj; Formularin Form.MAP-SHCK-08 për vlerësimin individual të kandidatëve për vendin e punës për të cilin nuk kërkohet njohja e ndonjë gjuhe të huaj; Formularin Form.MAP-SHCK-08 a; Formularin Form.MAP-SHCK-09; Kërkesën për punësim të ankueses e datës 23.09.2019; Diploma Universitare Nr.1684 të datës 24 maj 2007; Certifikatë e datës 07.05.2007; CV; Diplomë e shkollës së mesme e datës 24.06.21993; Certifikatë e datës 23-24 janar 2019; Certifikatë e datës 10.12.2018; Certifikatë e datës 04.05.2018; Vërtetim i datës 18.06.1999; Certifikatë e datës 1 qershor 2009; Certifikatë e datës 23-24 janar 2019; Certifikatë e datës 12.02.2008 deri me datë 06.01.2016; Letër reference për ankuesit e datës 25.07.2009; Letër reference për ankuesen e datës 25.03.2014; Vërtetim i datës 20.10.2006; Letër reference për ankuesen e datës 15.05.2012; Referencë e datës 04.11.2010; Vërtetim i datës 31.01.2013; Kontratë e punës e datës 16.10.2015; 25.07.2009; Kontratë e punës e datës 24.04.2018; Kontratë e punës e datës 25.04.2017; Kontratë e punës e datës 30.04.2019; Letër reference për ankuesen e datës 24.04.2019; Letër reference për ankuesen e datës 09.05.2007; Letër reference për ankuesen; Vërtetim i datës 31.01.2013; Letër reference për ankuesen e datës 18.02.2015; Vendimi i datës 14.10.2020 për vazhdimin e afatit, Njoftimi i MAP datës 8.10.2019 nr. 782/19, Njoftimi i datë 10.01.2020 nr.34.

Kolegji për shqyrtimin dhe vendosjen e ankesave, pasi ka shqyrtuar të gjitha shkresat e lëndës të parashtruara nga palët, ka konstatuar së pretendimet ankimore të ankuesit janë të bazuara, sepse:

Kolegji për shqyrtimin dhe vendosjen ankesave, duke shqyrtuar pretendimin ankimor të ankuesit sipas të cilit procedura e rekrutimit është anuluar në kundërshtim me legjislacionin në fuqi, ka konstatuar së U.d. e Sekretarit të Përgjithshëm të Ministrisë së Punëve të Brendshme, me rastin e nxjerrjes së Vendimit Nr.466 të datës 17.06.2020 për anulimin e konkursit për pozitën "Zyrtar për Verifikimin e të Dhënave" me arsyetimin se Ministria e Punëve të Brendshme dhe Ministria e Administratës Publike preken nga procesi i bashkimit sipas Vendimit Nr.07-V-005 të datës 03.02.2020 të Kuvendit të Republikës së Kosovës, ka vepruar në kundërshtim me nenin 32 paragrafi 1 të Ligjit Nr.03/L-149 për Shërbimin Civil, dhe nenin 3 paragrafi 2 të Rregullores Nr.08/2012 për Nëpunësit Civil Tepricë, ku përcaktohet së në rast të suprimimit ose bashkimit të një institucionin me një institucion tjetër, organi mbikëqyrës i institucionit përkatës, me vendim, cakton organin apo trupën punuese për hartimin dhe menaxhimin e programit për nëpunës civilë tepricë.

Kolegji për shqyrtimin dhe vendosjen e ankesave, konstaton së Ministria e Punëve të Brendshme me rastin e nxjerrjes së vendimit Nr.466 të datës 17.06.2020 për anulimin e konkursit mbi bazën e riorganizimit ka dështuar të ofroj argumente të dokumentuara së pozita "Zyrtar i lartë për Riintegrim" është identifikuar si pozitë e cila do të shuhet pas bashkimit me Ministrinë e Administratës Publike. Kolegji, po ashtu vlerëson se vetëm Vendimi Nr.07-v-005 i datës 03.02.2020 i Kuvendit të Republikës së Kosovës për bashkimin e Ministrisë së Punëve të Brendshme me Ministrinë e Administratës Publike, pa një plan të tranzicionit të aprovuar nga organet kompetente, nuk është bazë e mjaftueshme për anulimin e konkursit në një fazë të procedurës ku kandidati ka fituar të gjitha të drejtat për emërim në Shërbim Civil.

Po ashtu, Kolegji për shqyrtimin dhe vendosjen e ankesave, duke e shqyrtuar vendimin me Nr.466 të datë 17.06.2020 për anulimin e konkursit me arsyetimin se është shkelur neni 26 i Rregullores Nr.02/2010 për Procedurat e Rekrutimit në Shërbimin Civil, ka konstatuar se Ministria e Punëve të Brendshme, meqenëse ka shpallur konkursin për pozitën e lartcekur më datë 14.09.2020 i njëjti konkurs është pezulluar sipas njoftimit të datës 08.10.2019, por pas krijimit të rrethanave të reja respektivisht pas njoftimit të datës 10.01.2020 të Ministria e Administratës Publike si ministri përgjegjësie për administrimin e Shërbimit Civil, për vazhdimin e procedurave sipas dispozitave të Ligji Nr. 03/L-149 për Shërbimin Civil të Republikës së Kosovës" atëherë Ministria e Punëve të Brendshme ka vazhduar procedurën e rekrutimit, ku më datë 05.02.2020 ka nxjerr Vendim me Nr. 79/20 me të cilin ka bërë themelimin e Komisionit Përzgjedhës të Shërbimit Civil, pastaj i njëjti komision më datë 11.02.2020 ka përgatitur listën e shkurtër, më datë 13.02.2020 është mbajtur testi me shkrim për kandidatët e listës së shkurtër ndërsa më datë 19.02.2020 është mbajtur testimi me gojë për kandidatët që kanë kaluar testin me shkrim, mbi bazë të këtyre Kolegji për shqyrtimin e vendosjen e ankesave, konstaton se lista e shkurtër për këtë pozitë është përgatitur brenda afatit ligjor të përcaktuar me nenin 26 të Rregullores Nr.02/2010 për Procedurat e

Rekrutimit në Shërbimin Civil, po ashtu procedura e themelimit të Komisionit Përzgjedhës të Shërbimit Civil, testimi me shkrim dhe testimi me gojë është zhvilluar në pajtim me nenin 7, 36 dhe 38 të Rregullores Nr. 02/2010 për Procedurat e Rekrutimit në Shërbimin Civil. Kështu që Vendimi me Nr. 466 i datë 17/06/2020 i U.d. Sekretarit të Përgjithshëm të Ministrisë së Punëve të Brendshme për anulim të konkursi siç u theksuar edhe më lartë është në kundërshtim të plotë me Ligjin Nr. 03/L-149 për Shërbimin Civil të Republikës së Kosovës, Rregullores Nr.02/2010 për Procedurat e Rekrutimit në Shërbimin Civil dhe Rregullores Nr.08/2010 për Nëpunësit Civilë Tepricë, sepse arsyetimi i këtij vendimi është i pa bazë dhe në kundërshtim të plotë me nenin 48 paragrafin 2 të Ligjit Nr. 05/L-031 për Procedurën e Përgjithshme Administrative, i cili përcakton: *"Një arsyetim që është dukshëm i pamjaftueshëm, i paqartë, kundërthënës apo i pakuptueshëm, është i barabartë me mungesën e tij"* dhe nenin 52 paragrafin 1 nën paragrafin 1.3 dhe 1.5 të Ligjit Nr. 05/L-031 për Procedurën e Përgjithshme Administrative, i cili përcakton: *"Një akt administrativ është i paligjshëm nëse është rezultat i shkeljes të dispozitave lidhur me procedurën administrative...është në kundërshtim me ligjin material"* mbi këtë bazë pretendimet e ankuesit janë të bazuara.

Kolegji për shqyrtimin dhe vendosjen e ankesave, konstaton se kriteret e konkursit për pozitën "Zyrtar i lartë për Riintegrim" në Drejtoratin për Riintegrimin e Personave të Riatdhesuar të shpallur nga Ministria e Punëve të Brendshme kanë qenë: *"Diplomë universitare: Fakulteti Juridik, Fakultetit Ekonomik ose shkenca tjera shoqërore. Minimum tri (3) vite përvojë pune profesionale"*, si rrjedhojë në bazë të kriterëve të konkursit ankuesi ka plotësuar të gjitha kriteret e konkursit si tek përgatitja profesionale po ashtu edhe tek përvoja e punës, kështu që Kolegji për shqyrtimin dhe vendosjen e ankesave, në bazë të shqyrtimit të kësaj procedure konstaton se kjo procedurë e rekrutimit është zhvilluar në pajtim me dispozitat e nenit 11 paragrafi 1 dhe nenit 18 paragrafi 1 të Ligjit Nr. 03/L-149 për Shërbimin Civil të Republikës së Kosovës dhe Rregulloren Nr.02/2010 për Procedurat e Rekrutimit në Shërbimin Civil të Kosovës.

Kolegji për shqyrtimin dhe vendosjen e ankesave, meqenëse ka konstatuar që kjo procedurë është zhvilluar në pajtim me legjislacionin për Shërbimin Civil të Republikës së Kosovës, atëherë Ministria e Punëve të Brendshme pas shpalljes se njoftimit për kandidatin e suksesshëm ka qenë e obliguar që ankuesit t'i lëshoj Akt Emërimin në pajtim me nenin 19 paragrafin 1 të Ligjit Nr. 03/L-149 për Shërbimin Civil të Republikës së Kosovës, nenin 41 paragrafin 1 të Rregullores Nr.02/2010 për Procedurat e Rekrutimit në Shërbimin Civil të Kosovës dhe Rregullore Nr.07/2010 për Emërimin e Nëpunësve Civilë, meqenëse kandidati i suksesshëm [REDAKTUAR] ka arritur numrin me të madh të pikëve në testin me shkrim dhe me gojë siç përcaktohet me nenin 40 paragrafin 1 të Rregullores Nr.02/2010 për Procedurat e Rekrutimit në Shërbimin Civil.

Kolegji për shqyrtimin dhe vendosjen e ankesave, ka konstatuar që Komisioni për Zgjidhjen e Kontesteve dhe Ankesave i Ministrisë së Punëve të Brendshme me rastin e nxjerrjes së Vendimit me Nr.330 20 të datës 04.08.2020 me të cili ka refuzuar ankesën e ankuesit duke e lënë në fuqi Vendimin me Nr.466 të datë 17/06/2020 të U.d. Sekretarit të Përgjithshëm të Ministrisë së Punëve të Brendshme, ka vepruar në kundërshtim me dispozitat e Ligjit Nr. 03/L-149 për Shërbimin Civil të Republikës së Kosovës, Rregullores Nr.05/2011 për Procedurat e Zgjidhjes së Kontesteve dhe Ankesave dhe Ligjit Nr.05/L-031

për Procedurën e Përgjithshme Administrative, sepse nuk ka shqyrtuar pretendimet ankimore të ankueses duke mos vërtetuar drejtë gjendjen faktike dhe bazën juridike.

Kolegji për shqyrtimin dhe vendosjen e ankesave, në bazë të shqyrtimit të të gjitha provave të lëndës, konstaton që Sekretari i Përgjithshëm i Ministrisë së Punëve të Brendshme është i obliguar që në pajtim me raportin final të Komisionit Përzgjedhës për pozitën "Zyrtar i lartë për Riintegrim" dhe në pajtim me dispozitat e nenit 19 të Ligjit Nr. 03/L-149 për Shërbimin Civil të Republikës së Kosovës, nenit 41 të Rregullores Nr. 02/2010 për Procedurat e Rekrutimit në Shërbimin Civil, dhe dispozitat e Rregullores Nr. 07/2010 për Emërimin e Nëpunësve Civil, të bëjë lëshimin e Akt Emërimit për kandidatin e suksesshëm [REDACTED] për pozitën "Zyrtar i lartë për Riintegrim".

Në rast të moszbatimit të vendimit të Këshillit nga personi përgjegjës i përcaktuar në dispozitiv të këtij vendimi, Kryetari i Këshillit ndërmarr të gjitha veprimet në pajtim me nenin 21, 23 dhe 24 të Ligji Nr.06/L-048 për Këshillin e Pavarur Mbikëqyrës për Shërbimin Civil të Kosovës, duke aplikuar edhe ndalimin e 50 % të pagës mujore për personin përgjegjës, deri në zbatimin e vendimit të Këshillit.

Bazuar në këto rrethana, Kolegji për shqyrtimin e ankesave, pas analizimit dhe vlerësimit të të gjitha shkresave të lëndës si dhe duke u bazuar në kompetencën e Këshillit, vendosi si në dispozitiv të këtij Vendimi.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë - Departamenti Për Çështje Administrativ, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalin ekzekutimin e këtij vendimi.

Këshilli i Pavarur Mbikëqyrës për Shërbimin Civil të Kosovës
Lënda me numër A.nr.251/2020

Ardita Haxhnikaj-Demi

Ardita Haxhnikaj-Demi
Kryetar i Kolegjit

Zyle Millaku Gojnovci

Zyle Millaku Gojnovci
procesmbajtëse

Vendimi i dërgohet

- Ankueses [REDACTED]
- Sekretarit të Përgjithshëm të Ministrisë së Punëve të Brendshme;
- Udhëheqësit të Burimeve Njerëzore në Ministrinë e Punëve të Brendshme; dhe
- Arkivit të KPMSHCK-së

